

DOA COVID 19

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ

وَالصَّلَاةُ وَالسَّلَامُ عَلَى رَسُولِ اللَّهِ الْأَمِينِ سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ

Ya Allah, ya Rahman, ya Rahim,

Saat ini kami mengangkat tangan memohon ke hadirat-Mu, memohon perlindungan dan pertolongan daripada-Mu, ya Allah. Kami sedar, kami akur, wabak Covid 19 ini adalah teguran daripada-Mu, ya Allah. Maka, ampunkan segala dosa kami, kesalahan dan kesilapan kami, ya Allah. bantulah kami, hamba-hamba-Mu yang lemah ini, ya Allah. Angkatlah, hapuskanlah wabak ini, lenyapkannya, wahai Tuhan Yang Maha Berkuasa.

Ya Rabbal Alamin,

Lindungilah kami, keluarga kami, anak-anak kami, jiran tetangga kami dan negara kami dan seluruh dunia daripada wabak ini, ya Allah. Sembuhkanlah mereka yang telah dijangkiti. Sembuhkan mereka yang sedang dirawat, ya Allah. Berikan kekuatan dan kesabaran kepada barisan hadapan kami yang sedang bertungkus-lumus berjuang merawat pesakit-pesakit dan memerangi wabak ini, ya Allah.

Ya Zaljalali wal Ikram,

Sesungguhnya kami amat sedih dengan apa yang menimpa kami ini, ya Allah. Hanya Engkau yang Maha Berkuasa. Berilah kami kekuatan, ya Allah. Berilah keupayaan agar kami menghadapi semua ini. Semoga kami dapat memperbaiki kekurangan, kelemahan kami, ya Allah. Semoga ada hikmah di sebalik ujian-Mu ini. Semoga semakin kuat keimanan dan ketakwaan kami kepada-Mu, ya Allah.

Ya Jabbar, ya Mutakabbir,

Kami sedar, banyak yang mahu Engkau tunjukkan kepada kami atas musibah ini. Ampunkanlah kami, ya Allah jika ini adalah kemurkaan-Mu kepada kami. Jentiklah hati kami agar kami sedar akan kesilapan yang telah kami lakukan. Semoga kami sentiasa bermuhasabah diri kami. Semoga dapat diperbetulkan kehidupan kami, ya Allah.

Ya Allah, ya Rahman, Ra Rahim,

Pertemukan kami dengan Ramadhan yang tidak lami lagi, ya Allah. Maka segelah Engkau angkat wabak ini. Dekatkanlah hati-hati kami dengan-Mu agar sentiasa beribadah kepada-Mu, ya Allah. Berilah kami peluang dan ruang lagi untuk kami berjemaah di rumah-rumah-Mu, ya Allah.

Ya Allah,

Jauhkan kami daripada perasaan hasad dengki, dendam, dan buruk sangka sesama kami. Berilah di sebalik semua musibah ini agar umat Islam semakin kuat dan hidup aman dan

damai. Terangilah hidup kami dengan cahaya petunjuk-Mu. Limpahilah kami dengan rahmat kasih sayang-Mu. Sejahterakan kami dunia dan akhirat, ya Allah.

Ya Allah, ya Rahman, Ra Rahim,

Kurniakanlah kekuatan kepada kami dengan sebab pembacaan al-Quran. Kurniakanlah kekuatan dan kesihatan kepada dengan kemuliaan dan ketinggian al-Quran. Ampunilah kami dan perkenankanlah doa kami dengan kemuliaan mukjizat al-Quran.

رَبَّنَا عَلَيْكَ تَوَكَّلْنَا وَإِلَيْكَ أَنبْنَا وَإِلَيْكَ الْمَصِيرُ. رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً
وَقِنَا عَذَابَ النَّارِ. وَصَلَّى اللَّهُ عَلَى مُحَمَّدٍ وَعَلَى آلِهِ وَأَصْحَابِهِ وَسَلَّمَ،
وَالْحَمْدُ لِلَّهِ رَبِّ الْعَالَمِينَ